

## **PAULO ENA REVAREVA FILEMONA ENA**

<sup>1</sup> Lau Paulo, Keriso Iesu dainai abi-mauri tauna, varavarada Timoteo ida, raruosi ese emai lalokau Filemona, ai ida ta āgaukara heboumu taumu, a tore henimumu. <sup>2</sup> Oi bona taihumai Apia, bona bamomai Arekipo, ia ida a tuari heboumu, bona ekalesia oreana emu ruma ai e heboumu, a tore henimuimu, a tomu: <sup>3</sup> Harihari-bada bona maino, Tamada Dirava ena amo bona Lohiabada Iesu Keriso ena amo, bavabi.

<sup>4</sup> Na āguriārimu negadia iboudiai oi na lalomumu, bona Dirava na hanamoamu; <sup>5</sup> badina be na kamonaimu oi ese Lohiabada Iesu o lalokau heniamu bona o abidadama heniamu, helāga taudia danu o lalokau henidiamu bona o abidadama henidiamu. <sup>6</sup> Taunabunai egū āguriāri be oiemu abidadama huahuana baine dobi idia ediai, Keriso lalonai ita edai e miamu āgaudia namodia iboudiai bae diba. <sup>7</sup> Una dainai, tadigu e, name moale bada bona taugu danu eme lo, emu lalokau dainai, badina be helāga taudia lalodia vada o hakeru.

<sup>8</sup> Taunabunai, Keriso ladana ai bama haāganimu diba, ede boma kara toma, <sup>9</sup> to lalokau dainai asina haāganimumu, na noimumu hari. Oibe, lau Paulo, tau badana bona Keriso Iesu ena abi mauri tauna, <sup>10</sup> na nounumu natugu Onesimo, iāgui ai na nohomu ai tamana ai na hahelao merona, dainai. <sup>11</sup> Gunaguna ena hesiai ilao-henina na dika oiemu ai, a harihari ena hesiai ilao-henina na namo, oiemu ai bona lauegu ai. <sup>12</sup> Na siaia loumu, be

vasimu, bona lalogu idoinai danu ia ida. <sup>13</sup> Bena egu ura be bama dogoa tao, sivarai namo ena iñgi ai isiaigu bema lao hen, oi ibolomu. <sup>14</sup> To asina uramu kara ta baina karaia, oi do so gwau maoro negana ai; egu ura be emu kara namo na dia lauegu hahedua dainai a oiemu ura dainai bema vara.

<sup>15</sup> Badina bunai, readia, una nega sina oiemu amo e heabi oho, bavabia hanaihanai helaooreana: <sup>16</sup> dia hesiai tauna, a hesiai e hereaiamu tauna, varavara bona lalokau, lauegu bona oiemu, tauanina ai bona Lohiabada lalonai.

<sup>17</sup> Lau be oi turamu o tomamu; benaini, ia bavabia dae, lau boma abigu dae heğereğerena. <sup>18</sup> A ia ese e hadikamu eiava emu ai e abi torehai readia: benaini, ena abi-torehai egu ai ba gwauraia. <sup>19</sup> Lau Paulo sibogu imagu ai na toreamu: davana idoinai do baina henimu.

Asina tomu oi ese laumamu egu ai o abia doa; <sup>20</sup> ġau tamona, tadigu e, mani ba hamoalegu Lohiabada lalonai, lalogu ba hakerua Keriso lalonai. <sup>21</sup> Lalogu na e tomamu ba kamonai henigu dainai na tore henimumu; dibagu na gwauraimu kardia ba hereadia.

<sup>22</sup> Vadivadi daiutuna ta bavabia heğaeğae lauegu; badina be name helaro emu ġuriğuri daidiai egu vasi dalana baine helailai.

<sup>23</sup> Bamogu Epafra, Keriso Iesu dainai lau ida iñgi ai a nohomu, ese e hahenamo henimumu.

<sup>24</sup> Mareko bona Aristako bona Dema bona Luka, lau ida a ġaukara heboumu, ese danu e hahenamo henimumu. <sup>25</sup> Lohiabada Iesu Keriso ena harihari-bada laumamu ai baine mia.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 21 Feb 2024 from source files dated 31 Aug 2023

35028c04-b277-5da3-8163-bb2fd39b90ca